



## Kujisalimisha kwa Mfinyanzi

### Mkuu

**L**akini sasa, Ee Bwana, wewe u baba yetu; sisi tu udongo, nawe u mfinyanzi wetu; sisi sote tu kazi ya mikono yako.—Isaya 64:8.

Wakati mwanadamu anapopanga na kutengeneza mipango yake mwenyewe juu ya jambo ambalo Mungu amemzuilia kufanya, anakutana na wakati mgumu. Huwa analalamika na kuhangaika, na matatizo yake yanaongezeka zaidi. Lakini anapojisalimisha kuwa kama udongo mikononi mwa mfinyanzi, ndipo Mungu anamfanyia kazi na kumtengeneza kuwa chombo cha heshima. Udongo unakubali kufinyangwa. Kama Mungu angepata nafasi, mamia ya watu wangepinyangwa na kufanywa kuwa vyombo kama Anavyoona inafaa.

Ruhusu mkono wa Mungu ufinyange udongo kwa ajili ya huduma Yake. Yeye Anajua aina ya chombo anachotaka. Yeye amempatia kazi kila mtu. Mungu anajua ni wapi mtu anafaa zaidi. Wengi wanatenda kinyume na mapenzi ya Mungu, na wanaharibu mfumo. Bwana anataka kila mtu awe mnyenyekevu chini ya uongozi Wake wa kiungu. Atawaweka watu mahali ambapo watakubali kufinyangwa ili wawe na umoja na Kristo, wakibeba mfano Wake wa kiungu. Ikiwa nafsi itakubali kufinyangwa, ikiwa utaungana na Mungu, ikiwa utaomba kwa umoja, kufanya kazi kwa umoja, kila mtu akichukua nafasi yake kama nyuzi katika utando wa maisha, utakuwa kama kitambaa kizuri ambacho kitauletea furaha ulimwengu wa Mungu.

Mfinyanzi hawezi kufinyanga na kutengeneza chombo cha heshima ambacho hakijawahi kuwekwa mikononi Mwake. Maisha ya Kikristo ni maisha ya kujitoa kila siku, kujisalimisha, na kushinda kila wakati. Kila siku 'ushindi mpya utapatikana. Nafsi lazima isahauliwe, na upendo wa Mungu lazima uendelezwe bila kukoma. Kwa namna hiyo tunakua ndani ya Kristo. Hivi ndivyo maisha yanavyofinyangwa kulingana na mfano wa Mungu.

Kila mtoto wa Mungu anatakiwa kufanya jitihada zake zote kuinua kiwango cha ukweli. Anatakiwa kufanya kazi kwa mpangilio wa Mungu. Ikiwa nafsi inajitukuza, Kristo hatukuzwi. Katika Neno Lake, Mungu anajifananisha na mfinyanzi, na watu Wake wanafananishwa na udongo. Kazi Yake ni kuwafinyanga na kuwatengeza kufuatana na mfano Wake mwenyewe. Funzo wanalotakiwa kulipata ni funzo la unyenyekevu. Nafsi haipaswi kupewa umuhimu mkubwa. Ikiwa tahadhari inawekwa kwa maagizo ya Mungu, ikiwa nafsi itasalimishwa kwa mapenzi ya Mungu, mkono wa mfinyanzi utaweza kutoa chombo chenye umbo nzuri (The S.D.A. Bible Commentary, Ellen G. White Comments, vol. 4, 1154).

Mfinyanzi huchukua udongo mikononi mwake na kuufinyanga na kuutengeneza kulingana na mapenzi yake mwenyewe. Anaukanda na kuufanyia kazi. Anaupasua kisha anaukandamiza tena.... Hivyo ndivyo unavyokuwa chombo kinachofaa kutumiwa. Vivyo hivyo, Mfinyanzi Mkuu anatamani kutufinyanga na kututengeneza. Na kama udongo ulivyo mikononi mwa mfinyanzi, ndiyo tunavyopaswa kuwa mikononi Mwake. Hatupaswi kujaribu kufanya kazi ya mfinyanzi. Sehemu yetu ni kujitoa kwa ajili ya kufinyangwa na Mfinyanzi Mkuu (Testimonies For The Church 8:186, 187).